

Aruba tambe a participa n'e conferencia: "The Boy Problem"

Pakico mucha muhernan ta destaca mas cu e mucha hombernan?



DIANAN 27 y 28 di november ultimo, e conferencia "The Boy Problem in Education" a wordo realiza na Corsow. E organizacion di e conferencia tabata den man di Comision Nacional di UNESCO Antiyas y "the University of the West Indies". Base p'e conferencia tabata e hecho cu ya pa algun aña caba ta wordo reporta cu den algun pais di SurAmerica y e region di Caribe e mucha muher ta

produci mihor den educacion compara cu mucha homber. Un problema creciente den e region tambe e hecho cu e mucha homber ta produi na un nivel hopi mas abao compara cu mucha muher y hasta tin menos mucha homber inscribi den e sistema educacional di e paisnan. Tur esey a haci cu a wordo dicidi pa wak mihor kico ta pasando cu e mucha homber den e sistema educacional di e



diferente paisnan.

E Comision Nacional di UNESCO Antiyas a haya e fondonan pa haci un estudio riba e isla di Antiyas y Universidad di West Indies tambe tabatin informacion relevante.

E lugar p'e conferencia na Corsow tabata Marriot Hotel y Universidad di Antiyas y a conta cu representante di diferente pais. E informacion relevante di e diferente investigacion a wordo duna dor di e.o. sra. Omayra Leeftang, Ministro di Educacion di Antiyas, sra. Susan Charles di University of the West Indies y sra. Goretti Narain di UNESCO.

Algun factor cu a wordo discuti tabata e factor personal di e mucha homber, aspecto relaciona cu nan famia, aspecto di e situacion di scol, factornan politico y social y tambe aspecto di violencia na cas, scol y den comunidad.

Un di e conclusion di e conferencia tabata cu mester duna atencion n'e mucha homber no solamente den educacion, pero tambe den otro esfera pa di e manera ey contraresta nan participacion den aspecto negativo y nan falta di participacion den e sistema educacional.

Sra. Jeanine Tromp, trahador social di Fundacion Telefon pa Hubentud tabata un di e rep-

resentante di Aruba cu a asisti n'e conferencia y pa final di januari 2010 e ta bay transmiti su conocimiento y experiencia n'e boluntario di e fundacion cu ta atende yamada via telefon y cu ta duna informacion na hoben.

E diasabra ey den januari 2010 ta bay tin dos presentacion p'e boluntario, un ta di sr. Errol Zebeda kende ta bay trata e topico di "Problematica di Loverboy". Esey t'e fenomeno unda mucha homber ta aserca y enamora mucha muher di edad menor, cumpra cosnan caro pa nan y despues di algun tempo forza e mucha muher pa tene relacion sexual cu otro persona pa placa (prostitucion).

E otro di dos presentacion t'e ora ey di "Boy Problem" cu informacion duna dor di sra. Jeanine Tromp. Pensamento di e Fundacion Telefon pa Hubentud ta cu su boluntario mester haya a base regular e informacion necesario pa por haci e trabao na nivel halto y pesey e inversion ta wordo haci algun biaha pa aña pa duna curso y presentacion di topico relevante.